

26. august 2014

UKA 2014/28

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Timikkut tarnikkullu innarluutillit angajoqqaavi oqilisaanneqartarnissaannut misiliutissamut 2016-mut Aningaasanut Inatsisissatut Siunnersuummi Naalackersuisut 200.000 kr.-nik immikkoortitsinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Ruth Heilmann, Siumut)

Tungavilersuut:

Innarluutillit angajoqqaavisa peqatigiiffiata ”Inooqat”-ip aqqissugaanik isumasioqatigiittarnerni angajoqqaajusut oqilisaanneqarnissaat annertuumik pisariaqartinneqartoq peqataasunit saqqummiunneqartarpoq. Maluginiagassaavorli aqqissuussaannerusumik erseqqissunillu malittarisassaqannginnera pillugu qanoq iliussissaminnik angajoqqaat nalornisinneqartartut aammalu periarfissanik assigiinngissitaartunik kommunini piareersimasoqartannginnera ajornartorsiuterujussuusarluni.

Meeqqanut innarluutilinnut angajoqqaajusut ikiorsiisarnermut neqeroorutininik amigaateqarput, allatut oqaatigalugu meeqqat innarluutillit angajoqqaavisa atugaasa oqilisarnissaat amigaatigaarput. Pissutsit aqqiivigineqarnissaat annertuumik pisariaqartinneqarpoq, taamaattumilluuna oqilisaassinissamut misiliutaasumik aningasaliisoqarnissaa siunnersuutigigiga.

Oqilisaanneqarnissamut angerlarsimaffimmik, angajoqqaarsianik oqilisaasartussanik aammalu paarsisunik ilinniarsimasunik amigaateqarpugut.

Assersuutigalugu innarluuteqartoq filmeriarusuttoq angajoqqaat ilagissallugu nukissaqarfiginngikkunikku taava paarsisartup ilinniarsimasup innarluuteqartoq filmeriaqatigisinnaavaa.

Periarfissat taamaattut neqeroorutigineqarsinnaalissappata Inatsisartut Naalackersuisullu siunnesuut una tapersersortariaqarpaat. Misiliummik suliniutip uuma aallartinneqarnissaani ”Inooqat” aammalu KANUKOKA peqataatinneqarsinnaasariaqarput, sorlduttaaq innarluutilinnik suliaqarlutik ukiorpanni misilittagaqarlualrutik Najugaqarfimmi Elisebannguami Maniitsumiittumi sulisorineqartut aammalu Tungujortuaqqami Qaqortumiittumi sulisorineqartut suleqatigineqarsinnaasut.

Siunnersuutip aningaasatigut allaffissornikkullu pisortanut kinguneqaatissai

Misiliutaasumik aningaasaliinissamut iliuusissatut pilersaarusiorneq allaffissornikkut aningaasartuutaanissaa naatsorsuutigineqarpoq, ukiup affaa avillugu sulinermik naleqartumik (125.000 kr.-nit missaani). Siunnersuut akuersisutigineqassappat politikikkut pingaanersiunerup kingorna AIS2016-imi 200.000 kr.-nik aningaasaliisoqartariaqassaaq.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai

Soqanngilaq.